

四庫全書

集部

欽定四庫全書

宋元詩會卷六十九

兵部主事陳焯編

杜瑛

字文玉其先霸州信安人金將亡避地河南緱氏山中時兵後文物凋喪瑛搜訪遺書盡讀之得其指趣古今得失如指諸掌間闕轉徙教授汾晉間中書鉅祿珪開府于相瑛赴其聘遂家焉與良田千畝辭不受歲已未世祖南伐至相召見問計瑛條對稱旨上悅曰儒者中乃有此人乎中統初詔徵瑛時王文統方用事辭不就杜門著書一不以窮通動其志年七十遺命二子處立處愿曰吾即

死當表吾墓曰緱山杜處士云所著春秋地里原委語孟荀通皇極引用皇極疑事極學律呂律歷禮樂雜志合文

集共七十卷

留春曲

絮飛冷屑龍蟠玉花隕香摧鳳銜燭批頰深林叫新綠
倚闌人唱留春曲春光欲去如死灰明年暖風吹又來
何如日日長相守典衣共醉花前杯殷勤留春春不住
白日西馳水東去鏡中絲髮奈老何君當持杯我欲歌

弔故宮

月上觚稜椒壁濕饑烏啄碎琅玕石劫灰飛盡海揚塵
廢殿荒臺土花碧洛陽書生汴梁客一夜春風頭欲白
尊中賴有酒如泉醉倚寒窗破愁寂

秋思

壯心忽忽劇縣旌秋氣能令客子驚白雁不聞雲外過
清霜先向鬢邊生銅駝巷陌周東土金鳳樓臺鄴北城
千古繁華俱一夢空餘草木戰風聲

征南口號

春早雲南麥已黃瀘江蒸霧水如湯馬蹄半帶陰山雪
變作人天六月涼

劉詵

字桂翁廬陵人幼失父自知樹立年十二作為科
場文有老成氣象既冠重厚醇雅以師道自居教
學者有法聲譽日隆江南行御史臺屢以遺逸薦
不報詵為文根本六經融液今古而不露其踔厲
風發之狀四方求文者日至其門其
集曰桂隱詵所號也年八十三卒

感興
四首

昔在唐虞時萬象昭白日聖人垂龍衣巖殿吹鳳律朱

草聯階生景星當戶出羣賢布天下野穀盡嘉實嗟哉
戰國交九寓淪戈戟糟糠委仁義軒蓋寵權術孟軻起
驅馳白髮颯垂軾空餘七篇書千載資歎息

姬室逸其御天下皆兵交楚武首僭王名器從此清仲
父佐伯業仗義何嘒嘒正辭削其僭王綱可復昭奈何
舍近事遠問南舟膠堂堂匡周師所得僅一茅所以魯
仲尼加之器小嘲良會不再得誰能遏秦嶠

秦人燔詩書聖道散若烟宮殿干斗極東遊問神仙漢

祖祠孔子遂為百代先大哉禮樂意所見何卓然因勢
導其趨勇赴如決川但恨羣臣間餘習猶橐鞬良平雖
善慮不在三代前安得豁達資一見賈少年

峨峨蓬萊山白玉為洞房仙人雲霧衣侍女冰雪妝丹
霞縹緲中往來皆鳳凰借問羣仙人何者為秦皇羣仙
顧我笑振袂凌風翔我有金鼎丹鍊之踰千霜相期息
瑤樹歲晚何渺茫吾聞仙人家美酒如瓊漿長生所願
求得醉亦可償

春寒閒居

西里夜圍燭東鄰朝玩山相視無羨心豐約自不關芳
草滿幽庭日晏人未還久陰忽微暄孤禽語花間

古意

昨日苦大燠酬以今日寒天道極必反人事盛必剋剛
柔有迭施消長乘兩端彼美者誰子一生困辛酸日宴
食未炊冬月衣不完著書垂白髮門草秋漫漫天道何
由詰俯仰良自歎

詩窮

作詩能窮人誰能忍不作但見平生愁霏霏筆端落朝
騎孤鳳凰暮駕兩黃鶴手攜王子晉吹笙上寥廓人言
忌太高下筆寧淺弱窮通信有命詩道未可薄

天道

種稻南山邊雨足多稻穗一朝疾風來腐折不可刈東
家不知耕雨粟夜滿地問渠安得之飽食了無愧我欲
廢鉏耰雨粟非可覲人事且自盡天道勿徒恃

雜詩

空山有一婦二十失所天貞心比堅石血淚迸湧泉寒
燈役機杼拾穗裙不完婚男與嫁女辛苦雪滿顛自謂
分當爾節義何足言城中壘孀姬潛好留少年門前立
旌木世人何由傳

古詩贈張漢臣遊金陵

古詩出性情聲在閭巷間採之被絃歌聽者醇風還大
音既寥濶羣喙何間闕燕昏混良璞楚策藏崇蘭妙理

忽有合正在不可刪秋高星河空天風吹珮環

石人

石門何年啓疑與開闢俱上有遺世人形軀略模糊山
空明月寒往來誰與徒吾聞晉榆石能言禎妖樞又聞
穀城公頗窺陰符書叩之了不應無乃嗔我愚

中秋故鄉南鄰楊氏招飲

老來歸故里百事非故情惟有山間月猶作兒時明是
時秋且半夕氣忽已清南鄰招客飲步聽危澗聲月色

酒中亂樹影盤中橫鄉曲佳節意風露白髮莖我懷豈
在酒酒觴且徐傾

芍藥

夏早衆綠翳堦蘼始獨開窈窕專后德深房出徘徊翠
蕤擁帝輦手擎紫霞杯夜永宮月酣餘香散蓬萊

曉行

星明天宇迴山驛鼓初發行人稍已動露氣漫野白方
塘浸道隅荒荒似寒月日出炊烟橫雞聲隔林樾

呈須溪劉先生

仙人三山來袖有五尺琴綠尾龍門植朱絲軒轅音攜
之曾謁舜三奏鳳舞庭風高天路斷歸見崑崙青起視
八極間琅琅成孤鳴綠海凝不動白日回夜明時違地
亦失猶使天下傾但恨無子期彼直樂其名

蕭子有以左耳陶瓶對客煎茶名快媳婦坐間為
賦十六韻

南中土埴堅妙器出陶火控搏雅以靜整削平不頗渾

淪象瓜團短小類橘顆粵柳實盡剝蜀芋膚未剖喙如
柄揭西耳若柳生左油滋飾外鍛灰盆增下裏高齋奉
煎烹湯勢疾軒簸狹束蟹眼高薄逼車聲播俄頃潤渴
喉巧婦愧其惰乃知轉旋工政要傾酌安主翁嗜吟詩
佳客時滿座呼童汲清深淪雪澆磊砢急需既能應閒
棄無不可東家重函鼎菌蠹腹徒果美人預為釐常恐
遲及禍何如且小用慎勿誚么麼

贈趙中山

中山本舊公子于道有得
蚤遊京師為諸名公所敬

先生昔佩青珊瑚錦袍白馬玉雪膚夜遊釣天聽廣樂
帝旁分食瓊宮酥天風千丈吹綠髮紫鴛七十黃流蘇
手斟北斗酌玉女麻姑曉報滄溟枯東方烏啼白日薄
姓名盡變騎鯨魚華池內養九芝露金房獨照千年珠
肩摩淨名孔雀扇足躡子晉芙蓉車吹笙看月薊門市
從者皆服貂襜褕羣真虛左願聞道親寫文字為其徒
少年經世二十策海水洗盡無留餘始知古來忠孝士
變幻不與常人俱君不見韓亡流落子房子千秋萬歲

傳編書

讀此可知天水利流亦多變姓名入道者彼承旨公獨何心哉

兒時喜見雪

兒時喜見雪癡待天雲黃晝觀捲箔恨暝色夜聞攬裘
思曙光佳人踏靴映玉靨獵士鞚馬驂白鳳千金高樓
換美酒樓外三尺酒百觴寶香繡帳春色暖俯視萬里
成大荒便從淮城取元濟直至延海歸蘇郎邇來悔狂
年已過閉門讀書學堅卧蒲團竹几聽蕭瑟畏寒自補
油窗破欲論往事誰復知但見羣兒似昔時

昭君曲

漢宮美人人不識初出宮門天下惜
漢宮歌舞人不傳琵琶馬上行人憐
君王含情重悽惻只在殿前留不得
人生豈是無知音知音已晚徒傷心
天寒衰草沙似雪舉頭惟見漢宮月
十年漢使去無蹤夢中長在明光宮
國家和親四海樂不怨君王悲命薄
君不見秋風茂陵英雄才萬里江都
嫁沙漠

前醉歌

天青青造就萬古事不平月皓皓照盡世間人醜好人
言天月俱無心平頗醜好皆由人我言人生無智力明
月青天愁所集簞瓢貧士年少死相君蒸乳老無齒販
屠市兒萬戶侯著經儒生白滿頭李君晚役將軍府文
昌碑起韓碑仆啓期九十無一兒遷哲多孫披籍知雄
狐妓圍釵列屋朝雄悲歌夕牧犢楚和抱璞哭山中燕
人寶石緹十重百年老樹同一幹半作犧樽半溝斷古
來恨事何其多青天明月奈爾何我有一斗酒澆君肝

肺之嵯峨青天明月奈爾何

後醉歌

天如輪我行與之周八垠月如壁我坐對之居一室買
酒酌月月滿卮買酒澆天天飲之長風吹天碧萬里纖
雲飛盡月如水黃金滿塢董將軍長安夜炬高焚雲胡
椒八百元相國翠珥寶釵落荆棘征南奇勲泣杜郵屬
鏤憤入洪濤秋禹山血濺麒麟閣機雲夢遶華亭鶴波
心詞臣溺滿衣何如讀書閉山扉斷頭博士窘乘障何

如得句支藜杖山中老人無機權有酒只勸月與天青
天明月俱欣然

貴賤吟

庚午大飢天下死者相望秋大熟穀反大賤

春大饑斗粟不易娉婷姬秋大熟三錢直買一斗粟人
間貴賤反掌異賤未可輕貴難恃君不見土龍百拜還
為塵病駒秣豆乘錦裯人間貴賤元無真

題劉平妻殺虎圖

君不見杞梁妻夫死但能哀聲悲又不見泰山婦虎食

其夫哭當路人生伉儷重百年閨房無力救所天空餘
肝腸裂千寸高徹遙漢卑重泉何如濱州劉平妻獨勇
殺虎奪夫曳其踵大兒三歲能助力小兒坐席癡不恐
沙空月落山谷深妾命何輕夫命重當時視虎如兔狐
眼中無虎惟有夫一朝義聲震百郡裴旻李廣皆庸奴
古來君臣亦如此患難政要忠良扶何為當熊待馮媛
何為敵來使鶴戰射猿老將世豈多搏檠車右今不見
秋風展圖毛髮起始信人間有倫紀嗚呼河東女兒扶

眼去其夫若見此圖當潏

九日郊行

九日登高處心情歲歲同
平田初穫稻曠野屢聞鴻
風景悲塵世江山閱寓公
茱萸朝雨濕愁報綠樽空

酬以芳見貽

山露沾琴潤山風到鬢寒
酌多迷夢覺語久雜悲歡
身豈如泥爪鬚難染石肝
不知明月在何處是瑤壇

和彭琦初見壽

陋巷秋風處士家回思千劫算炊沙小年曾似三眠柳
老去羞看九日花白髮夜深燈館字蒲團日宴地爐茶
故人賸作飛騰祝試聽漁陽一搥撾

送劉巨川赴惠州海豐巡檢

大博之孫

須溪孫子好才名百丈龍山繞屋春文學盡交天下士
弓刀更治嶺南民盾頭墨潤長亭雪扇外旗麾列嶂塵
若見羅浮花爛熳可能遠寄一枝新

閒居即事

小窗挂額看雲過不斷東風吹鬢皤松古何知春至早
花濃偏值雨來多已安薄相食無肉更覺衰顏酒不酤
無力能為移粟政有愁自賦采薇歌

彭琦初用坡翁紙帳韻惠建昌楮衾次韻為謝

雪絲揉碎密縈連清卧梅花性更便茸暖何須蠻客帳
座寒但少廣文氈窗升紅日那知曉夢壓白雲疑近天
但恐少陵茅屋漏雨宵沾破不成眠

戴表元

字帥初慶元奉化人七歲學古詩文多奇語宋咸
淳中入太學既而試禮部第十人登進士乙科教
授建寧府稍遷臨安教授行戶部掌故皆不就大
德八年表元年已六十餘用薦起家拜信州教授
調婺州以疾辭最後翰林以修撰博士論薦而老
疾不可起矣史稱其學博而肆其文清深雅潔化
陳腐為神奇至元大德間為東南文章第一人
惜其集不多見也門人最知名者為袁楠云

飛花行贈馬衢州

山上風花山下飛花飛欲盡山翁歸遲亦自忘行迹
但覺滿地紅依依餘花更惜隨溪去溪上遊人山下路
戀家漁父斷來踪避難劉郎記前度花開花落春風前

我昔與翁同少年祇今鶴去但華表何處烏啼悲杜鵑
遊人自遊春日暮從翁問花花不語且當向花日日醉
醉倒花前學花舞

東離湖州七十里泊南潯佳聚落也

張帆出東郭沽酒問南潯画屋蘆花淨紅牆柳樹深魚
艘寒滿港橘市畫成林吾道真迂濶浮家尚越吟

苕溪

六月苕溪路人看似若耶漁罾挂棕樹酒舫出荷花碧

水千塍共青山一道斜人間無限事不厭是桑麻

送同年潘昌朝

客路秋深又送迎狂歌爛飲慰飄零風前數髮莖莖白
馬上看山段段青古穴無丹生洞氣高林有鶴避潮腥
明年更欲三茅去擬借新箋道德經

送百上人并簡善之

聞說西湖已自憐君遊更徬早春天六橋水暖初楊柳
三竺春深未杜鵑舊壁草生尋舊刻新巖茶熟試新泉

城中詩友曾相識西蜀殘儒解草玄

吳澄

字幼清撫州崇仁人生三歲穎悟日發五歲勤學
夜讀書至旦母憂其過勞節膏火不多與澄候寢
然火復誦既長貫穿經傳嘗舉進士不中至元十
三年樂安鄭松招澄居布水谷乃著孝經章句校
定六籍御史程鉅夫奉詔求賢起澄至京師未幾
以母老辭歸左丞董士選延之於家親執饋食曰
吳先生天下士也既入朝薦澄有道擢應奉翰林
文字有司敦勸久之方至聞已有代者即日南歸
未幾除江西儒學副提舉以疾去官至大元年召
為國子監丞陞司業立教法四條未及行一夕謝
去俄拜集賢直學士疾作不果行泰定元年充經
筵講官修英宗實錄成未上即移疾歸詔加資善

大夫賜鈔五千貫卒年八十五學者稱草廬先生
贈左丞追封臨川郡公諡文正 按元儒先後輩
出于趙江漢諸公外其著者則導江張璠蘭谿金
履祥休寧陳櫟資州黃澤北海蕭軒豫章熊朋來
等諸所撰述皆有功聖賢甚大惜
其詩不傳故于是編莫由采入也

題唐隱士盧鴻十志圖

嵩高地中區下有隱者廬兩徵堅不起一志終不渝好
爵等浮雲還歸對生徒官為營草堂殊恩耀山隅邇來
數百年十境入畫圖之子服儒服浸淫老莊書翛然有
仙意生白一室虛三宿戒凝戀十境亦可無

送涂君歸浙

昨歲抱琴來今茲抱琴去
委質隨長風斷蓬與飛絮
一
家蠡湖南一住西湖東
兩地各繾綣寸心漫怔忡
浮雲
豈無依倦鳥亦有棲迎門
穉婦笑索果嬌兒啼歸裝
春
袖薄荒徑春花落理曲到
求凰何人悲別鶴

雪谷早行為張允中作

路絕人蹤失關隘
槎枒老樹森矛介
兩間寥廓淨無塵
誰剪天花徧飛灑
風絮當頭零亂舞
茲遊浪說平生快

蹇駑瘦骨真耐寒踏破鴻濛新色界豈是提兵李常侍
夜發文城薄淮蔡又非直諫韓侍郎遠謫潮陽出秦塞
面黎凍圻髭綴銀何事催君早行邁君不見古昔閉門
僵卧人高似灞橋驢背償詩債

過枯河

高堂出郭二舍近午憩東陽安樂鎮雙堤對峙似城牆
中坳一道如壕圳驅車下坂為溝塍低平盡處還復登
半坳一門字斗大濱滄行鹽兩分界不知此是古黃河

且行且顧心疑怪前詢父老為余言河北山東此處分
古河來自白馬渡東過開州城下去遂達浮光粵魯河
入海當年由此處

壽王講師

欲雪未雪雲黯黑不知此日神仙謫桃實今經幾度紅
梅花仍似當年白厭向閩山食荔枝喜來江浦訪鸞簫
廣文客舍寒如許自有春風長藥苗

次韻楊司業

春夏華榮變衰歇積飈刮肌山露骨騷人望秋悲沈寥
忽見小春梅蕊發頓然喜氣排寒冬不管天令嚴缺鉞
古來蹈道如蹈水與泊與齊偕出沒坐中白晝對羲皇
門外黃埃自城闕只憐郭璞註蟲魚或誤蔡謨啖蜚蠊
爭似冥冥雲翼遠靜看滑滑霜蹄蹶公桑十畝邇洙泗
我菊一區連楚越縣知真樂在曲肱到處扁舟堪散髮
我能振袂從公遊分我南溪半風月

湖口阻風登江磯山觀濤

狂風吹人渾欲倒
瑟瑟寒聲動秋草
捫蘿徑上磯頭山
萬頃江湖波浩渺
怒鱗雲鬣奔騰來
眩目快心千樣好
向曾觀海難為觀
回首匡廬青未了
玄雲作帽深蒙頭
五老藏昂元不老
何時月夜水鏡淨
潏蕩澄虛納蒼昊
著我峰尖伴老人
坐看海東紅日杲

為舒景春賦東臯

東臯種杏者今住杏花村
收穀虎衛道銜珠蛇報恩
窗紅開曉色草碧驗春溫
豈待閒舒嘯栢湖真有孫

贈裴子晉

怪子拋家去歸來非故吾
閱人如水鏡知己慎江湖
宿雨添新漲春風滿舊廬
忽忽又言別聊為賦驪駒

和劉尚友

挺挺詞林秀栖越嶠東
幾年淹此鳳何日見猶龍
郊時文中子談遷太史公
萬金家寶在昭代定遭逢

豫章貢院即事奉和雲林提舉

客裏秋光好歸心不厭遲
牆低孤塔見院靜一簾垂
隔

紙聞風怒臨堦看日移宛然似三徑未負菊花期

貢院中和張仲美

牆外浮屠壓古城案頭文字浩縱橫不辭霜鬢年華老
又辦天朝歲貢英秋隴故園迷蝶夢曉窗客枕厭雞聲
何當孺子亭前去省想高風浣俗情

送丹陵胡道士遊京師

遠遊誰為賦新篇來自丹陵小洞天拂日一鞭聊復爾
御風雙袂已飄然快看鵬海三千里早證龍沙八百仙

莫戀射熊春夢樂贈詩人在斗牛邊

次韻胡器之問病

鶯聲睨曉燕差池春到閒中日更遲
偶躡清都陪淨侶誰知勝境即良醫
屋頭月上元無夜樹杪風來似有期
坐客屢談渾忘答問余還職在何時

次韻息窩道人

三年隻影落天涯望極南雲眼欲花
道上已驚仙枕夢河邊誤泛客星槎
梨秋熟供新飯桃李春榮滿舊家

喜得息窩消息好黃金粲粲待披沙

客中即事次韻元復初郊行

客中又過二分春聞道千紅百紫新
雨到庭隅長芳草日窺窗隙弄游塵
縣知萬里只如此孤坐一堂還可人
不信却須凌倒景九天樓閣倚長身

題閣阜山

漢吳仙跡兩峰齊欲拾瑤華路恐迷
寶殿青紅疑地湧林巒蒼翠接天低
九重香案分雲篆八景琅函記玉題

仙鶴翔空清似水，步虛聲在朶雲西。

用贈李粲然韻述懷

故里香秔滑欲流，歸田計晚愧遲留。
縣知海上三山客，塵視人間萬戶侯。
南去擬尋吳市卒，北來喜共李仙舟。
玄翁一室渾無白，誰識王龔貢鮑優。

次別易耕雲

別去家山經歲年，乍歸又著嶺南鞭。
雙眸眩眊番船載，滿口腥鹹海物鮮。
次水霜寧受滓世間粉黛自爭妍。

早來共此青春樂日暖風和無際邊

疊葉梅

羅浮夢斷杳無踪冰雪仙姿兩兩逢
縞袂怯單寒後襲粉妝嫌薄曉來濃
迎風一笑知顏厚臨水相看見影重
道眼只將平等視玉環飛燕總天容

夜坐

物情自適更誰禁草際螢飛鳥宿林
魯叟爾來無夢寐蜀莊此去只冥沈
客中又見秋風起夜半初聞木葉吟

涼意逼人眠不得坐看孤月到天心

次韻芍藥

寒冱深冬宿異根發榮今日謝春恩
淺潮半醉流霞暈清印初昏淡月痕
花下蜂狂成勝集草間狼藉到芳樽
紫芝興味亦如此誰信京華有綺園

次韻牡丹

誰是舊時姚魏家喜從官舍得奇葩
風前月下嬌嬈態天上人間富貴花
化魄他年鎖子骨點唇何處箭頭砂

後庭玉樹閒歌曲羞殺陳宮說麗華

何榮祖

字繼先其先太原人金亡徙家廣平榮祖狀貌魁偉額有赤文背負隆起有相者謂曰子位極人臣且壽相也少以吏累遷中書省掾擢御史臺都事始折節讀書日記數千言阿哈瑪特專權監察御史范方等劾奏甚力阿哈瑪特知榮祖主其謀奏為左右都事以隸已未幾御史臺除治書侍御史升侍御史出為山東按察而阿哈瑪特莫逞其志遷按察河南除雲南行省參知政事以母老辭又拜御史中丞復出為山東東西道按察使召入為尚書參知政事時持論與僧格左以病告未幾起為尚書右丞僧格敗改中書右丞奏行所定至元新格請改按察為肅政廉訪司而立監治之法尋拜昭文館

大學士預中書省事又加平章政事
卒年七十九追封趙國公諡文憲

齋居雜言

名教無窮樂真知在暮年中庸萬事畢太極一心全世
事頻觀易人情靜看天興來時有句率爾亦飄然

郝天挺

字繼先出都魯別族居安肅州凡五世父巴圖爾
于憲宗之世多著武功天挺英爽有志畧幼受業
元好問世祖召見嘉其容止有旨俾執文字備宿
衛春宮久之除叅議雲南行尚書省事擢廉訪漢
中入為吏部尚書三除外任俱不赴拜中書右丞
與宰相論事有不合輒面斥之成宗崩仁宗以太

后命首定大難及武宗入正大統天挺與有力焉
自是朝廷大事必召天挺密議始行歷江西河南
二省右丞召拜御史中丞出為河南行省平章政
事卒年六十七追封冀國公諡文定有註唐人鼓
吹集
十卷

題麻姑壇

路入雲關仙境佳
瓊田瑤草帶烟霞
貯經洞古無遺檢
養藥爐存失舊砂
青鳥不傳金母信
紫鸞應返玉皇家
巖扉不掩春長在
開盡碧桃千樹花

徐世隆

字威卿陳州西華人弱冠登金正大四年進士辭
職讀書歲壬辰奉母北渡嚴實招致東平幕府俾
掌書記壬子祖召見于日月山時方征雲南以
問世隆對曰孟子有言不嗜殺人者能一之世祖
曰誠如卿言吾事濟矣中統元年擢燕京等路宣
撫使至元元年遷翰林侍講學士兼太常卿俄兼
戶部侍郎承詔定內外官制七年擢吏部尚書九
年乞補外為東昌路總管十四年以按察使提刑
山東明年移淮東十七年召為翰林學士以疾辭
二十二年再召不起賜田十頃時年八十卒所著
有瀛洲集百卷

挽文丞相

大元不殺文丞相君義臣忠兩得之義似漢皇封齒日

忠於蜀將斬顏時乾坤日月華夷見海嶺風霜草木知
只恐史書編不盡老夫和淚寫新詩

中聯一作精忠
貫日勁節凌霜

此詩通鑑與稗史俱譌為王磐作今蒐得元刻舊本
乃知是徐非王也按王磐仕元為翰林承旨承旨正
史官也安有史書編不到之慮乎焯於廿年前曾序
友人周子縕詩覲縷數百言致疑于王不當有是作
及覲元刻始釋此疑然前序亦不妨並存耳

熊朋來

字與可豫章人宋進士元初徵為
福建廬陵教授學者稱天慵先生

鐵柱詩

九牧失貢金司空不行水蛟龍弄波濤魑魅入城市吁
嗟清談晉萬事漫不理遂令千載人稽首旌陽子

趙世延

字子敬其先永古特人祖安札爾幼孤鞠于外大
父卓裕勒嘉謫其音為趙家遂以趙為氏世延天資
秀發喜讀書究心儒者之學弱冠世祖召見俾入
樞密院肄習官政至元二十一年授承事郎雲南
諸路提刑按察司判官二十六年擢監察御史與
同列五人劾丞相僧格不法其五人皆得罪而世

延幸免二十九年出僉江南湖北道肅政廉訪司
事踰年除山東廉訪江南行臺侍御史遷安西路
總管皇慶二年拜江浙行省叅知政事尋召還叅
大政中書歲餘遷御史中丞劾奏權臣特例德爾
罪惡有詔奪官尋陞翰林學士承旨進昭文館學
士留守大都未幾乞補外拜四川行省平章政事
仁宗崩特們德爾復相銳意報復屬其黨誘世延
從弟誣告世延欲置之死賴上護持屢繫得釋仍
歷官中外出入不常晚除奎章閣大學士翰林學
士承旨中書平章政事魯國公卒年七十七諡文
忠

代祀南嶽登祝融峰

天風吹我躡雲根一覽羣山蟻垤紛瀛海波翻初日上

石壇人語半空聞
炎荒作鎮荆吳遠
元氣流形天地分
何日東書煨芋室
孤峰絕頂看浮雲

商挺

字孟卿曹州濟陰人年二十四汴京破北走依冠氏趙天錫與元好問楊奐遊日盆知名世祖受京兆分地聞挺名遣使徵召入對稱旨字而不名憲宗征蜀挺謂不宜輕動世祖深然之及憲宗崩世祖北還挺奏當特嚴符信以防姦詐後額呼布格使至軍中執而斬之其效立見中統元年改宣撫司為行中書省俾挺僉行省事進叅知政事至元六年同僉樞密院事陞副使九年封皇子安西王以挺為王相會同官趙炳死朝廷執擅殺者鞠問伏辜語連挺及其子懃頌繫久之免死籍其家二

十年復樞密副使俄以疾辭卒年八十有詩
千餘首尤善隸書延祐間贈魯國公諡文定

水仙花二首

海外三山壁月明人間誰識許飛瓊
秋風吹上青鸞背
未散天香與素英

明月珠衣翡翠裳冰肌玉骨自清涼
不隨王母瑤池去
來侍維摩病几傍

王磐

字文炳廣平永年人世業農饒於貲金末父禧入
財佐軍興補進義副尉金人遷汴舉家避地魯山

磐客居貧甚年二十六擢正大四年進士授官不赴肆力問學轉徙淮襄間久之北歸楊惟中嚴實免依李壇居青州題其居曰鹿菴有終馬之意及壇謀不軌磐覺之脫身入京師世祖聞之嘉其誠節撫勞甚厚事平挈妻子至東平召拜翰林為學士遷太常少卿乞致仕不允江南既下朝儀官制多賴磐議以定進資德大夫致仕年九十二卒追諡文忠

澤陽山

今晨到硤谷駐馬五松邊山中富清景不暇相周旋瀑布落晴雪金燈開夜蓮空懷上方寺矯首浮雲巔

巨源相過話舊有感

中統三年春二月變起青齊帶吳越鯨鯢轉側海波翻
城郭橫尸野流血我時辛苦賊中來兵塵糝糊眼不開
妻孥棄捐豺虎口飛蓬飄轉無根荻天寒日暮齊河縣
破驛荒涼絕煙爨騎行驛馬鈍如蛙官吏散逃無處喚
與君此地忽相逢行臺郎中氣勢雄憫我白頭遭喪亂
壯我臨難全孤忠急呼驛吏具鞍馬使我厄路還亨通
明晨相隨濟南去出入條侯營壘中死生契濶不相棄

起居飲食常與同標山華注日在眼綿歷春草及秋風
四郊斫木桑柘盡灤源飲馬波濤空兇渠腰領膏野草
如見齊魯收烟烽巨源巨源君且坐我欲高歌君可和
仕事回頭十五年猶想離魂招楚些身逢播越百憂纏
生不成名空老大我依破硯竊恩榮君佐雄藩收最課
沅萍整聚不多時且喜相看顏一破我衰無力訪君難
願君得暇頻相過

馮子振

字海粟攸州人其豪俊與陳孚略同于天下之書無所不記當其為文也酒酣耳熱命侍史二三人潤筆以俟子振據案疾書隨紙多寡頃刻輒盡雖事料醲郁美如簇錦律之法度未免乖刺大約工于詞曲而詩文次之

塔燈

擎天一柱礙雲低
破暗功應日月齊
半夜火龍蟠地軸
八方星象下天梯
光搖灩澦涵珠蚌
影落滄溟照水犀
文焰逼人高萬丈
倒持鐵筆向空題

鶴骨笛

胎仙脫脰寄飛瓊換羽移宮學鳳鳴噴月未醒千載夢
徹雲猶帶九臯聲管含芝露吹香遠調引松風入髓清
莫向江頭吹暮雪籠中媒老正關情

江梅

若有人兮湘水濱冷香和月浸黃昏自憐不入離騷譜
待把芳心弔楚魂

溪梅

古樹橫斜澗水邊野橋村市獨暄妍玉堂路杳無心到

甘與漁翁繫釣船

野梅

瓊林浮翠淡朦朧
遙望珠仙隱見中
一夜東風吹不散
曉看渾似碧紗籠

老梅

古樹槎枒長綠苔
半邊生死尚花開
不須更問春深淺
人道咸平手種來

矮梅

不放冰梢數尺長怕分春色過鄰牆大材未必難為用
禹殿雲深鎖畫梁

蠟梅

洗却鉛華扮道妝檀心殘露紫香囊從今宮額翻新樣
變作眉間一點黃

宋元詩會卷六十九

欽定四庫全書

集部

宋元詩會卷七十一

詳校官中書臣陸湘

主事銜臣徐以坤覆勘

總校官知縣臣繆琪

校對官中書臣田尹衡

謄錄監生臣俞鳳

欽定四庫全書

宋元詩會卷七十

兵部主事陳焯編

盧摯

字處道號疎齋涿郡人坐右大書一天字其下細
注六字云有記性不急性善詩尤工詞曲與戴表
元同為至元中名士
歷官學士湖南廬訪

寄蕭徵君惟斗

秦中幽勝地迺在終南山
磬石負磊磊清泉散潺潺
侃

侃古君子疊疊泉石間圖史紛坐隅衡門晝長闌種菊
發落英襲芳佩秋蘭道腴德充符怡然有餘歡鳴鶴時
一來似愛孤雲閒孤雲不能飛鳴鶴遂空還澌澌桃李
艷鬱鬱松柏寒羲和駛春光歲晏霜露繁感物有深傲
懷哉邈難攀

題李伯時九歌圖

蒼龍四車載初陽綠天浮動開八荒連捲飛霧儼冠劍
四三神君翼東皇桂醕盜烈蘭餽芳楹筵巫覡紛披猖

瑤琴衫衣杳何許
兩妃倚竹臨空江
野烟顰翠九疑遠
暮雨灑恨湘波涼
冰夷閤投明月璣
山鬼夜嘯猿猱悲
長歌撫節懷楚纍
遺音踈越知者稀
築室賴有佳人期
紫壇荷屋薜荔帷
汀洲聊堪塞杜若
怨公子兮悵忘歸
恍恍怪墨含古色
虎頭癡絕公麟癡
續騷未成今見畫
忽欲輕舉超無為
朝來目送秋雲飛

淵明歸來圖

留侯晚歲遊赤松
武侯早歲稱卧龍
亡秦扶漢聲隆隆

淵明初非避俗翁兩侯大節將無同陽秋特書晉甲子
辭鋒時露長沙雄王弘何幸奉吾足督郵能芥平生胸
門前五柳春濛濛落絮不與江波東環堵蕭然吾未窮
北窗儘有羲皇風畫圖不盡千古意詩成一笑浮生空

采薇圖

服藥求長年孰與孤竹子一食西山薇萬古猶不死

茅山 三首

馬上微風散薄陰玉笙吹客過花林山中宰相杳何許

日暮碧峰雞犬音

澗邊瑤草洞中華
細水流春帶碧沙
昨夜山中酒初熟
道人不暇讀南華

竹杪飛亭枕石泉
松壇香霧散茶烟
鳥聲記得夜來雨
鹿夢驚回別有天

梁曾

字貢父燕人少好學日記書數千言中統四年用
王鶚薦辟中書左三部令史歷省掾至元十年授
雲南諸路行省都事歷廣南西宣撫司事除知南
陽府十七年進兵部尚書使安南十年正月授吏

部尚書再使安南其國有三門中曰陽明左曰日
新右曰雲會部臣郊迎將由日新門入曾大怒曰
奉詔不由中門是我辱君命也即回館待開陽明
門始入又責陳日燭親出迎詔且講新朝尚右之
禮以書往復者三宣布威德日燭感服三月命陪
臣詣闕請罪並上萬壽頌貢方物惟謹而以金幣
奇物為贐曾悉拒不受八月還京師陛見帝大悅
解衣賜之皇慶元年特授昭文館大學士乞致仕
不允再起為集賢侍講學士奉詔代祀
中岳病不復職至順二年卒年八十一

岳陽樓

樓前秋水健帆開
樓下涼風舞袖回
萬里舟帆通鳥道
四時雲雨護龍堆
江山如此不一醉
歲月幾何能再來

欲問老髯求鐵笛月中吹上紫荊臺

圖克坦公履

金后圖克坦之族世祖
朝官翰林侍讀學士

春日雜詠

東風簾幙半塵埃歌舞臺空書不開
試問雙飛新燕子
今年社日為誰來

楊果

字正卿祁州蒲陰人金正大甲申進士授偃師令
改滿城改陝皆以廉幹稱金亡歲己丑楊與徵河

南課稅起米為經歷未幾史天澤經略河南用為
參議世祖中統元年擢果北京宣撫使明年拜參
知政事至元六年出為懷孟路總管請老卒於家
年七十五諡文獻果工文章尤長於樂府有西菴
集行世

羽林行

銀鞍白馬鳴玉珂風花三月胭脂坡侍中女夫領軍子
萬金買斷青樓歌少年羽林出名字隨從武皇偏得意
當時事少遊幸多御馬御衣常得賜年年春水復秋山
風毛雨血金蓮川歸來宴賀滿宮醉山呼搖動東南天

明昌泰和承平久止人歲獻蒲萄酒一聲長嘯四海空
繁華事往空回首縣瓠月落城上牆天子死不為降王
羽林零落祇君在白頭辛苦趨路傍腰無長劍手無槍
欲語前事涕滿裳洛陽城下歲華暮秋風秋氣傷金瘡
龍門流出伊河水北望臨潢八千里蔡州新起髑髏臺
只合當年抱君死君家父兄健如虎一旦倉皇變為鼠
錦衣新貴見莫嗤得時失時令人悲

狄仁傑墓

牝雞聲裏紫宸寒
神龍都歸竊弄間
一語喚回鸚鵡夢
九霄奪得鳳雛還
荒墳寂莫臨官道
清節孤高直泰山
為問模稜蘓相國
當年相見愧何顏

洛陽懷古

洛陽雲樹鬱崔嵬
落日行人首重回
山勢忽從平野斷
河聲偏到故宮哀
五噫擬逐梁鴻去
六印休驚季子來
惆悵青槐舊時路
年年無數野棠開

申屠致遠

字大用東平壽張人世祖朝用薦
為經略同知事官至翰林待制

靜中吟

靜中有物即縈心物象相忘趣轉深為報柴桑陶處士

無絃爭似更無琴

魏璠

字山公金貞祐三年進士國勢危迫璠用薦以翰林修撰宣諭武仙軍前令仙進兵不應金亡無所歸世祖在潛邸聞璠名徵至和林詢當世之務璠陳便宜三十餘事帝嘉納多采用焉以疾卒於和林年七十
謚靖肅

西山書事

山勢回環西北高，彊燕自古出英豪。
地連雲朔偏宜馬，人襲衣冠盡帶刀。
塵暗玉樓無鳳宿，雲埋金水似龍韜。
可憐一片繁華地，空見春風長綠蒿。

滕賓

號玉霄，睢陽人。至元間，以填詞名家。其詩亦婉約，可誦。白雲平章求仙於燕京西山頂，一日適出玉霄訪之，不值，因戲題一絕於壁。類高真所為。白雲公歸，詰其由，不得疑。呂仙過之一時，喧傳朝野。競觀輻輳戶，外後知為玉霄戲。筆白雲公戒以勿泄，厚賂之。

吟人

吟人瘦倚欄干曲
酒醒香消午夢殘
燕子不來春社去
一簾疎雨杏花寒

紫芝道院

訪白雲平章不值戲題此詩

西風短褐吹黃埃
何不隨我遊蓬萊
狂歌醉舞下山去
後夜月明騎鶴來

宋 衛

字弘道潞州長子人年十七避地襄陽已而北歸
屏居河內者十五年趙壁經略河南聞其名禮聘

之中統三年擢翰林修撰六年以行省員外郎隨
征高麗復命慰勞甚優授河南總管府判官不赴
入為太常少卿十八年除秘書監二十年立詹事
院首命衛為太子賓客二十三年卒有鉅山集十
世卷行

次范約莊韻

家近西湖六月涼
蘭舟桂醕菱荷裳
海門潮上波濤壯
天竺風來草木黃
今日悲秋哦楚些
他年著論辨吳亡
君才位置聞人說
宜待詩仙七寶牀

已巳春往均州

武當卻立翠屏新
碧玉溶溶漢水奔
如畫江山千古在
城闌幾度戰塵昏

觀出獵 二首

金鉞染血犬銜毛
倒臂蒼鷹掣錦絛
紅日下山秋塞濶
齊歌野樂陣雲高

平原馬首雁行齊
狡兔深藏鳥不飛
環立傳觴人半醉
斜歌貂帽雪中歸

陳孚

字剛中台州臨海人幼穎慧絕倫讀書過目成誦至元中以布衣上大一統賦署上蔡書院山長考滿謁選京師世祖命梁曾以吏部尚書使安南調孚翰林國史院編修攝禮部郎中為曾副三十年正月至安南世子陳日燭以憂制不出郊迎曾與孚回館致書詰日燭以不庭之罪且責其無禮辭直氣壯昏孚筆也舉饋遺悉卻之使還授翰林侍制兼國史院編修帝方欲實之要地而廷臣嫉其方正遂除建德路總管府治中再遷衢州所至多善政厯台州路總管詔遣奉使宣撫循行諸道首發浙東元帥托歡徹爾不法諸事按實坐其罪孚亦以此致疾卒於家年六十四所著觀光稿行世

徐州

項王熊豹姿氣欲吞天下大呼渡河來山獄如崩瓦當

其火秦宮血湧渭水赭噴目叱諸侯膽落毛髮灑誰知
陰陵路浩歌淚如瀉惟徐乃故都昔此奠宗社尚想魏
臺上鐵櫟擁萬馬酒酣笳鼓鳴旌旗蔽原野及今亦何
有荒棘秋滿把皇天祚真主神器不可假豈有時雨師
刈人如土苴天亡君勿悲為君奠壘竿

涿州

晨發白溝河薄暮宿范陽殘城無雉堞枯木鳴白狼回
首望中原日落烟茫茫天低鵲沒處彷彿見太行緬懷

昭烈帝八尺鬚眉蒼平生漢社稷志欲為高光惜哉不
得就越在天一方里人亦何知牲酒奠樓桑車蓋不復
見但有秋草黃我來已千載誰復悲興亡天明登車去
塵霧沾衣裳

鄆陵

鄆陵昔構兵萬騎夜流血一矢忽飛來射落楚山月哀
哉公子側戰骨當速朽胡為三日穀易此半樽酒我今
不飲酒但飲落月光晉楚杳何處雉鳴烟茫茫

鸚鵡州

大江東南來孤洲屹枯蘚中有千載人殘骨寄偃蹇貽
漢黨錮禍薦紳半摧殄况復啖葛奴盡使羽翼剪天乎
鸞鳳姿乃此侶契犬想當落筆時酒酣玉卮洗鸚鵡何
足詠僅以雕蟲顯賢哉龐德公一犁老襄峴

淮安州

孤帆下江北千里西風輕泊舟公路浦始見南昌亭青
天下白露亂葉淒以聲汀洲結海色冉冉孤月生

秦長城

驅車出長城飲馬長城窟朔雲黃浩浩萬里見秋鶻
白骨渺何處腥風卷寒沙蒙恬劍下血化作川上花
祖龍一何愚社稷付征杵長城土未乾秦宮已焦土
千載不可問似聞鬼夜哭矯首武陵源紅霞滿川谷

洞庭月

月明水無痕冷光泣清露微風一披拂金影散無數
天地青茫茫白者獨有鷺鷥去月不搖一鏡湛如故

金蓮川

茫茫金蓮川日映山色赭天如碧油幢萬里罩平野野
中何所有深草卧羊馬昔人建離宮今存但古瓦秋風
吹白波猶似哀淚灑村女採金蓮芳香紅滿把豈知步
蓮人豔骨掩泉下

過鏡湖

鏡水八百里水光如鏡明偶尋古寺坐便有清風生天
濶雁一點山空猿數聲老僧作茗供笑下孤舟輕

覽社湖遇大風

天低烟冥冥平湖遶淮楚一帆東南來乃為風伯侮前
如殘葉飄後如輕蝶舞驚濤湧雪山濕浪濺銀雨嘗聞
貝宮胎夜夜靈光吐吾無盜睡心龍兮爾何怒舟師倚
斷桅相戒不得語亦有潛禱人拱手面如土回視天際
雁萬點落遠浦彼物何悠悠吾生浪自苦

暮雪

長空捲玉花汀洲白浩浩雁影不復見千山暮如曉漁

翁寒欲歸不記已陵道坐睡船自流雲深一蓑小

歸帆

日落牛羊歸渡頭動津鼓烟昏不見人
隱隱數聲櫓水波忽驚搖大魚亂跳舞
北風一何勁帆飛過南浦

洪贊井深有六七十丈者

洪贊山岩嶢勢如舞雙鳳大井千尺深窈然見空洞
野人驅十牛汲以五石甕滴水如寶珠一甕十室共我生
海東頭連漪飽清弄嘗聞慧山泉萬里驛騎送急呼茗

梳來試作清淨供

燕子樓

長相思久別離東風不暖殘燕友乳鴉困柔鸞悲櫻桃
泣紅膩靡蕪凋綠滋牙牀琥珀枕夢君君不知

雄州

燕南垂趙北際昔年魏城鐵可礪城上烽火明如晷只
今殘堞黃雲曠老榆半枯縣薜荔市翁叱馬聲嘒嘒叩
以瓦橋潛出涕英雄虎鬪空萬世北風吹沙秋鶴淚

盧溝曉月

長橋彎彎飲海鯨
河水不濺冰崢嶸
遠鷄數聲燈火杳
殘蟾猶映長庚橫
道上征車鐸聲急
霜花如錢馬鬣濕
忽驚沙際金影搖
白鷗飛下黃蘆立

玉泉垂虹

雪波碧湧千崖高
落花點點浮寒瑤
日斜忽有五彩氣
飛上太空橫作橋
古寺鐘殘塔鈴語
回首前村猶急雨
輕綃欲剪一幅秋
更逐西風過南浦

金臺夕照

魏坡十二青雲梯老樹偃伏猶穹圭長裾已翳星辰去
殘陽空挂盧溝西召南六百年宗社一日黃金重天下
精纏寶氣夜不收又見殘霞明朔野

出門別親友

停君漢水浮鴨之翠杓聽我嶧山棲鸞之綠桐男兒拂
衣出門去龍泉三尺光如虹君不見磻溪鶴髮釣魚者
偶擲漁竿來牧野白旄麾開炮烙烟桓圭朱芾侯青社

又不見南陽卧龍人不識一朝佐漢坐狼石羽扇輕搖
蛇鳥驚火精焰焰天西極旗亭四月柳如藍紫駟嘶風
黃金驂豈無叩牛歌亦有捫蝨談天生巉嵒萃律骨蒿
萊槁死誰能甘我欲登泰山扶筇款天關東溟弱水如
可攀手弄白日青雲間我欲渡黃河赤脚凌秋波水仙
樓閣高嵯峨徑叱海若咎蛟鼉停君翠杓聽我綠桐真
人開天六合同風騶虞鳳凰飛舞鎬宮有線五色獻於
重瞳補舜衣裳山龍華蟲虎豹九闕兮不可以達吾則

脫冠歸來兮丹丘之青峰長揖二三子目送西征鴻

銅雀臺

古臺百尺生野蒿昔誰築此當塗高上有三金步搖
滿陵松柏圍鳳綃西飛燕子東伯勞塵間泉下路迢迢
龍帳銀箏紫檀槽怨入漳河翻夜濤人生過眼草上露
白骨何由見歌舞不念漢家長陵一抔土玉匣珠襦鎖
秋雨

三高祠

君不見洛陽記室雙鬢皤不忍荊棘埋銅駝西風忽念
鱸魚膾歸來江上眠秋波又不見甫里先生心更苦河
朔生靈半黃土夕陽蓑笠二頃田口誦羲黃思太古二
君隱淪豈得已一生不及鴟夷子吳宮鹿走越山高脫
纓徑濯滄浪水丈夫此身繫乾坤豈甘便老菰蒲根古
今得失一卮酒我欲起酹汀鷗魂

常州

毘陵城西漁火紅家家夜香燒碧空荻花離離季子塚

楓葉索索春申宮鷄聲人語三千里大船小船浪相倚
鷗鷗一雙飛上天人在柁樓弄秋水

漢留侯廟

子房王佐才其風凜冰雪天遣鶴髮翁圯上授寶訣博
浪沙中千尺鐵祖龍未死膽已裂況此啗啞扛鼎夫不
直秋風一劍血談笑帷幄間六合雄雌決卯金四百年
只在三寸舌但恨漢德非姚虞不得身為古稷契雍熙
至治如可作豈肯脫冠挂北闕留城古祠今千載碧蘚

溷雨眠斷碣我恐至人或不死尚有笙鶴擁玉節酌泉
採菊往奠之回首芒碭墮山月

望泰山

扁舟浮泗來夜宿須句國眼明忽見玉芙蓉插天亭亭
千丈碧舟人為我言此乃七十二君之泰山天風吹落
黃峴露冰花亂灑龜蒙間七十二君今何在寶符朝朝
吐光彩千年老鶴巢雲松夜看白日湧東海東海青童
仙踞龜啖蟹鰲笑秦亭上攀蟠桃笑彼鞭石駕長橋天

帝之孫莫天極鮑魚狂魄腥山色我有東封書中含萬
古情欲奏天子甘泉殿手刻玉檢黃金繩寄聲為報牽
狗老先向石壇種瑤草

瓜洲

烟際繫孤舟蘆花滿櫂秋江空雙雁落天濶一星流急
鼓西津渡殘燈北固樓商人茅店下沽酒話揚州

越上早行

青鞋三十里草露惹衣斑潮落曹娥渡雲昏夏禹山秋

聲黃葉裏天影白鷗間欲問錢塘路漁家半掩關

吳松江長橋

松江波萬頃橋倚碧雲端白鳥穿屏小青天落鏡寒夕
陽明佛塔秋色老漁竿無限凭闌意何時此挂冠

真州

淮海三千里天開錦繡鄉烟濃楊柳重風淡菱荷香翠
戶妝營妓紅橋稅海商黃昏燈火鬧塵麝撲衣裳

邳州

沂水碧潺潺汀沙白鳥閒林邊郊子國烟際嶧陽山茅
屋秋先破荒村夜不關烹魚呼濁酒一笑夕陽間

黃石公廟在東阿縣穀城南

穀城黃石廟古木白雲深黃石有存沒素書無古今老
聃三世夢孺子一生心日落祠門掩殘鴉又滿林

獻州

萬里天東北西風獨杖藜雁聲秋帶魏樹色曉浮齊野
濶青烟淡天空白日低人家在何處隱隱野狐啼

度三花嶺

絕壁三千丈荒烟八九家黃茅青草瘴黑質白章蛇椒
攬高縣子芭蕉倒吐花嶺頭一回首何處是京華

感懷呈龐夷簡修撰張幼度應奉

二首

濫直承明署身閒似地仙雖無官長罵未敢酒家眠瘦
已寬朝服貧須乞酒錢最愁親舍遠夢遶白雲邊
五湖烟浪濶短櫂早歸休有母思臣密無人問客周闕
河雙鬢晚風雨一燈秋去矣金鑾夢寒汀對白鷗

雲州

天險龍門峽，縣崖兀老蒼。
千蹄天馬躍，一寸地椒香。
夜雪青氍帳，秋烟白土房。
路人遙指語，十里是溫湯。

桓州

躍馬長城外，方知眼界寬。
晴天雷雨急，暑夜雪霜寒。
鐵騎秋呼鶻，金盤曉薦獮。
柳營弓劍滿，容我一儒冠。

送修撰輔伯賢同知滑州

又作州官去，秋霜點鬢華。
風生白馬渡，月冷紫薇花。
三

金娛親老雙旌放吏衙重來定何日雲路有靈槎

寄揚州教授胡石塘

昔日光明闕昂然有此翁方聞前賈傳俄見罷申公瘦
已肩如鶴貧猶氣似虹北門端有待豈必滯儒宮

邯鄲懷古

數點寒峰擁翠嵐叢臺日落見漳南火枯襄子殘銅斗
土蝕平原舊玉簪宮閉沙丘空有雀兵吞函谷已如蟪蛄
回仙逆旅今存否世上黃梁夢正酣

鄂渚晚眺

黃鶴樓前木葉黃，白雲飛盡岸茫茫。
櫓聲搖月歸巫峽，燈影隨潮過漢陽。
庾令有塵汙簡冊，禰生無土蓋文章。
關千只認當年柳，留與行人記武昌。

鳳凰臺

鳳凰臺上野烏啼，笳鼓連雲日又西。
天地無情潮寂寞，英雄有恨黍高低。
殘桁夜雨迷朱雀，荒塚秋風怨白雞。
空有斷碑蒼蘚裏，千年留得謫仙題。

交趾使還

少年偶此請長纓
命落南州一羽輕
萬里上林無雁到
三更函谷有雞鳴
金戈影裏丹心苦
銅鼓聲中白髮生
已喜歸來身健在
夢回猶覺瘴魂驚

與李子構讀天寶遺事

四十乾坤拱紫宸
東風只屬倚闌人
玉鳬波暖驪山曉
金犢烟橫繡嶺春
七夕有釵畱羽客
千秋無鏡泣孤臣
紅塵一騎君休笑
中有漁陽萬騎塵

馬平謁柳侯廟

詞華一代日星尊
茶臼村童儼尚存
山左竟令驅癘鬼
庭中已悔乞天孫
善和里隔生前淚
文惠祠封死後魂
欲奠荔枝不知處
滿池榕葉擁朱門

偕翰林學士劉東崖禮部侍郎李兩山登憫忠寺

閣

天京朝萬國
十二舜神州
宮闕開中禁
閨河拱上游
扶桑彤氣近
析木紺光流
劍佩千牛衛
旌幢五鳳樓
玉泉

蟠地湧金塔插天浮北嶽瑤符出南溟瘴霧收人皆躋
壽域我亦步瀛洲智不如犀首癡猶過虎頭國恩難獨
報儒術幸同儔偶此登阿閣悠然望薊丘長庚欣識李
太白願依劉雪擁飛狐夜風號涿鹿秋黃花堆徑濕紅
葉帶城幽且盡一壺酒掀髯送白鷗

后土祠瓊花

荒棘萋萋后土宮芳根已逐綵雲空男兒別有揚州淚
不為瓊花滴曉風

露筋廟

白鳥飛空萬箭攢玉肌一夜粉痕乾殘碑何用誇筋露
要露平生鐵肺肝

陵母墓

太傅勲名半紙殘百年人子痛如山緣何方寸非徐庶
忍死慈親一劍間

磁州

漳水東流繞碧灣風蒲獵獵夕陽間帽簷不奈黃塵滿

賴有磁州數點山

博浪沙

一擊車中膽氣高
祖龍社稷已驚搖
如何十二金人外
猶有民間鐵未銷

思明州

手捧檳榔染蛤灰
峒中婦女趁墟來
蓬頭赤腳無鉛粉
只有風吹錦帶開

鹿酒香濃大甌肥
黃茅岡上紙錢飛
一聲鼓絕長鎗立

又是蠻巫祭鬼歸

毒蟲含弩滿汀沙
荒草深眠十丈蛇
遙望天邊紅似火
瘴雲飛落木棉花

刺竹叢叢苦筍生
山禽無數不知名
元宵已似春深後
龍眼花開蛤蚧鳴

明安驛道中

野鵲山頭野草黃
桼狐嶺上月茫茫
五更但覺天風冷
帳頂青氊一寸霜

湖上感舊

昔日珠樓擁翠鈿
女牆猶在草芊芊
東風第六橋邊柳
不見黃鸝見杜鵑

范增墓

七十衰翁兩鬢霜
西來一笑火咸陽
平生奇計無他事
只勸鴻門殺漢王

迴衡山縣望南嶽呈御史完顏修撰龐夷簡

雨洗松陰綠未乾
今朝山下倚欄干
一天露重月華濕

七十二峰生翠寒

臧夢解

號魯山慶元人宋末第進士未官而國亡至元十
三年從其鄉郡守將內附授奉訓大夫婺州路提
舉再授息州知州未行改海寧政平訟簡為諸州
縣最久之除同知桂陽路總管府事三十年擢奉
議大夫廣西肅政廉訪副使發奸摘伏如神大德
元年改江西按總管李個賊罪一道澄清六年遷
浙東九年除廣東肅政廉訪使遂請老退居杭州
以亞中大夫湖南宣慰副使致仕夢解博學洽聞
為時名儒所著有周官
考三卷春秋微一卷

直沽謠

雜還東入海歸來幾人在紛紛道路覓亨衢笑我蓬門
絕冠蓋虎不食堂上肉狼不驚里中婦風塵出門即險
阻何況茫茫海如許去年吳人赴燕薊南風吹人浪如
底一時輸粟得官歸殺馬椎牛宴閭里今年吳兒求高
遷復禱天妃海上船北風吹魂墜黑水始知溟渤皆墓
田勸君陸行莫忘萊州道水行莫忘沙門島豺狼當路
蛟龍爭寧論他人致身早君不見賈人剖腹藏明珠後
來無人鑒覆車明年五月南風起猶有行人問直沽

劉護贈魯山庶訪詩附見

肅政光華遠清臺啓至公節移庾嶺北輶發桂江東
楮帳篩寒月柳杯鼓朔風瘦童空捧杖負馬不裝絨
徽俗三年問威名百郡雄星芒垂許洛雪色照賓融
敷教有虞廟講經夫子宫清嚴銷獠盜易直牖倥侗
吏猾加咎竹官貪解印銅冤銷千白屋恩及萬黃童
花縵嬉冬暖弧笙吹歲豐夷珠人有佩粵布我無筒
剖決心如水驅馳鬢已蓬六條方奏最四牡欲歌功

為有澄清志，遲輸獻納忠。
纖雲添衣繡，飛霆亦乘驄。
楚尾吳頭會，三湘七澤通。
天文恢翼軫，地蓋接潭洪。
牙纛聯分政，旌旗列總戎。
鶩爭肥似雁，罷搏猛於熊。
懷璧枉無罪，見金忘有躬。
化源安汨汨，獄市積怱怱。
大器能繩物，先聲已擊蒙。
道傍豺果避，窟底兔成空。
勿珥終山筆，毋彎報怨弓。
左饋並右粥，後稷更先種。
采菊賦歸老，愛蓮無極翁。
理明輕勢利，語妙徹盲聾。
顧盼山須動，揄揚石可龍。
羽儀傾振鷺，啄抱徧哀鴻。

念昔初騰踏時方息戰攻考工崖黯黯試壘海朧朧
赤帑被三百素絲歌五總穩行卑劍閣善納小雲夢
甲子從頭數冠紳進秩穹階蘭香浣露田玉氣噓虹
世或探斯轂吾寧牯爾撞察魚應小慧聽蟻豈真聰
靜躁聆徽外剛柔省穀中江湖歸獨步宇宙涉丹衷
德驥曾思附仙丹偶未同耐寒衣故白好古佩仍蔥
夢枕頻鮮荔羈帆幾落楓會看楊綰貴不計孟郊窮
溫井覘陽長明奎卜道隆摘辭寧愛助華髮尚氎毼

王惲

字仲謀衛州汲縣人父祖俱仕金惲幼善屬文端操履與東魯王博文渤海王旭齊名時稱三王中統元年左丞姚樞宣撫東平辟為詳議官時勅諸路選儒吏之能理財者一人惲以選至京師上書論時政擢為中書省詳定官轉翰林修撰同知制誥兼國史院編修至元五年拜監察御史出為平陽路總管府判河南北道提刑按察副使尋遷燕南河北道改山東東西道提刑副使又改閩海道提刑按察使二十八年召授翰林學士進中奉大夫大憲五年乞致仕歸八年六月卒贈承旨追封太原郡公謚文定所著有相鑑五十卷并雜著詩文合為一百卷

義使行

有序

予為王著作劍歌行繼更曰義俠或詢其所以因為之解曰彼惡貫盈禍及天下大臣當言天吏得以顯戮而著處心積慮一旦用計殺之快則快矣終非正理夫以匹夫之微竊殺生之柄不謂之俠可乎然大姦大惡凡民罔不慙又按春秋法亂臣賊子人人得而誅之不以義與之可乎古今游俠若是者不數人如讓之止報已私軻之糜軀無成則此舉越尋常萬萬也凡人臨小利害尚且顧父母念妻子慮一發不

中且致後患著之心孰謂不及此哉然所以略不顧
惜者良由義激於衷捐一身為輕為天下除害為重
也著字子明益都人沈毅有膽氣輕才重義不屑小
節嘗為吏不樂去而從軍得千夫長歸有是舉死年
二十九時至元十九年壬午歲三月十七日云

君不見悲風蕭蕭易水寒荆軻西去不復還狂圖祇與
螭蛛靡至今恨骨埋秦關又不見豫讓義所激漆身吞
炭人不識糜軀但酬一已恩三制褰衣竟何益超今冠

古無與儔堂堂義烈王青州午年辰月丁丑夜漢允榮
祕通神謀春坊代作魯兩觀殂魄已褫曾夷猶袖中金
鉞斬馬劍談笑馘取姦臣頭九重天子為動色萬命拔
出顛崖幽陂陀燕血濟時雨一洗六合妖氛收丈夫百
年等一死死得其所鴻毛輜我知精誠耿不滅白虹貫
日霜橫秋潮頭不作子胥怒地下當與龍逢遊長歌落
筆增慨慷覺我髮豎寒飈颺燈前山鬼忽悲歎鐵面御
史君其羞

輝縣卓水泉

鏡中流水畫中山
酒盡銀瓶興未闌
碧玉沼深人不見
柳花飛渡翠琅玕

孟攀鱗

字駕之雲內人父祖皆仕金攀鱗幼號奇童正大
七年擢進士第仕至朝散大夫招討使壬辰汴京
下北歸居平陽世祖中統三年召授翰林待制同
修國史帝嘗問宗廟郊祀儀制攀鱗據經典以對
因命攀鱗會太常議定禮儀俄以病乞歸
卒年六十四贈承旨平原郡公謚文定

春浦帆歸圖

涵空水色碧於苔照眼山光翠作堆疑是桃花源上客
輕舟天外得春來

張易

字簡父趙州人至元間官樞密副使誤以兵授賊坐誅

送魯齋先生南歸

衮衮諸公入省闈先生承詔獨南歸道逢時否貧何病
老得身閒古亦稀行色一杯燕市酒春風三月故山薇
到家已及蠶生日布穀催耕隴麥肥

周應極

鄱陽人官集賢待制
其所居名誠存堂

宿李陵臺

野戍平蕪入曠懷
征鞍小駐李陵臺
關河萬里秋風晚
霜月一天鴻雁來
持節蘓卿真壯士
開邊漢武亦奇才
千年陳跡無窮意
且向郵亭酌酒盃

劉致

石州寧鄉人其父彥文字子章中統間官懷集令
致從姚燧游燧稱致文清拔宏豔見彥文誌銘中

姑蘇臺

麋鹿應知易代頻
吳趨佳唱不堪聞
捧心臺暗梨花月
抉目門深薜荔雲
江闕水犀歐冶劍
氣騰金虎闔閭墳
計然已死鴟夷逝
寂寞五湖西日曛

宋元詩會卷七十